


Galaxia recibiu a Medalla de Galicia. O mesmo 25 de xullo que a Editorial Galaxia facía os 58 anos, o presidente da Xunta entregoulle ao vicepresidente do Consello de Administración da empresa, Benxamín Casal (na foto), a Medalla de Galicia 'por renovar o galeguismo'. Touriño, destacou que Galaxia conseguira renovar o galeguismo até un punto que se converteu "nunha actitude cívica máis que unha ideoloxía partidaria". "Galaxia é un proxecto en marcha", proclamou Casal na súa intervención no acto, ao que tamén asistiron, entre outros, o ministro de Cultura, César Antonio Molina; o delegado do Goberno en Galicia, Manuel Ameixeiras; o alcalde de Santiago, Xosé Sánchez Bugallo; así como o vicepresidente da Xunta, Anxo Quintana.●



PACO VILABARROS

Promoven un manifesto 'a prol da convivencia lingüística'

X.C.

De *Superpiñeiro* a Manuel Rivas, de Mercedes Peón a Ana Ki-ro ou o histórico galeguista Ave-lino Pousa Antelo, desde o pasado 23 de xullo vén promovéndose a sinatura dun verdadeiro contramanifesto en defensa da convivencia lingüística, que é resposta ao promovido polo xornal 'El Mundo' e encabezado polo filósofo Fernando Savater e o locutor da COPE, Federico Jiménez Losantos.

A proposta, aberta ás adhesións, está a medrar na rede. En palabras de Carlos Callón, presidente da Mesa pola Normalización Lingüística, unha das entidades promotoras "reclamamos o dereito a poder vivir en galego con normalidade e que o galego teña todas as garantías de oficialidade como tamén as debe ter o castelán"

Para a Mesa, o manifesto pola lingua común "ten similitudes coas teses franquistas". Por iso reclama que "se poida vivir sen que haxa cidadáns de primeira e de segunda pola súa lingua de orixe".

RELEVOMEDIÁTICO. Piñeiro, un dos máis populares presentadores da TVG foi o encargado de dar lectura pública ao manifesto nun acto celebrado no Auditorio de Galicia. Piñeiro cualificou de "preocupante" a estratexia de asociacións como Galicia Bilingüe para facer crer que "os falantes de castelán están discriminados".

A proposta de manifesto civil, segue a anteriores pronunciamentos, como o da Federación de Escritores galegos, vascos e cataláns, Galeusca, o 11 de xullo, e nunha dirección semellante o dun grupo de historiadores das tres nacionalidades.●



De pé, Xoán Costa, Benigno Pereira, Ignacio Villar, Cesáreo Sánchez Iglesias e Xosé Lastra. Na mesa, Yolanda Castaño, Xosé Manuel Piñeiro, Carlos Callón, Ave-lino Pousa Antelo e Alfonso García Sanmartín, durante a presentación do Manifesto

Texto íntegro do Manifesto



As persoas que promovemos esta chamada queremos manifestar, perante as institucións de autogoberno e como aclaración perante a sociedade galega, o seguinte:

1.- O pobo galego ten dereito a que a súa lingua propia (orixinaria) sexa oficial a todos os efectos no seu ámbito territorial. Os usuarios do galego deben desfrutar no seu territorio do mesmo status legal que o castelán ten no seu.

2.- A situación do galego está

moi lonxe de ser así. Non desfrutamos de dereitos lingüísticos plenos para desenvolver a nosa vida diaria con normalidade na nosa lingua na nosa terra. Son os falantes do galego os que resultan discriminados. É o galego o que corre perigo como idioma e os galegos falantes os que non son debidamente respectados. Vivimos unha grande inxustiza que é a negación da igualdade e da verdadeira convivencia.

3.- Por iso, resulta realmente preocupante que, desde Madrid, con apoio de importantes medios de comunicación, haxa quen pretenda convencer á opinión pública de que o castelán corre perigo de desaparición e que os seus falantes son discriminados no noso país. Esta inversión da realidade ten como obxectivo que os falantes do galego non teñan dereitos lingüísticos e que os únicos deberes para as Administracións

públicas se vinculen ao castelán.

4.- O verdadeiro problema non está na cooficialidade de idiomas como o galego, senón na actitude de quen nega a existencia de pobos e linguas diferentes no Estado español. Esta actitude si é a negación da convivencia e da igualdade. O proceso de normalización de usos do galego foi lento e, até hoxe, insuficiente para garantir o dereito a vivir nesta lingua. O que compre é respectar a legalidade vixente (Estatuto e Lei de Normalización Lingüística) e avanzar con cambios legais na dirección da igualdade e da convivencia. Xustamente a dirección contraria á proposta polos que pretenden a imposición do castelán como único idioma con dereitos e deberes para os cidadáns en todo o territorio do Estado.

5.- Correspóndelle ao pobo galego, a través das súas institucións representativas, definir a política

lingüística acorde co criterio de cooficialidade e de lingua propia que mesmo o actual Estatuto reconece para o noso idioma. Esperamos o compromiso das institucións de autogoberno na defensa da igualdade plena de dereitos para o galego e na aplicación de medidas a favor da normalización dos seus usos. Neste labor contarán sempre co noso apoio.

6.- Alertamos á sociedade galega para non se deixar confundir e instámola a cavar sobre a verdadeira situación do galego no propio país.

Defendemos un dereito humano elemental que nos define, ademais, como pobo diferenciado. Debemos ser firmes rexeitando todo posicionamento que persiga recortar dereitos ou retroceder no cativo camiño andado tanto nas administracións públicas, como na vida social.●